



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
14 Dezembru 2024

Xefe Suku Malere husu ba membru Konsellu Suku no comunidade sira ne'ebé partisipa iha treinamentu ne'ebé JSMP fasilita atu fahe tutan informasaun ne'ebé simu ba comunidade sira seluk

Iha 12 Dezembru 2024, JSMP fahe informasaun ba membru Konsellu Suku nomós membru comunidade sira iha Suku Malere, Postu Administrativu Aileu, Munisípiu Aileu.

Matéria treinamentu kona-ba asesu ba justisa formál, tipu krime sira, krime violénsia bazeia ba jéneru, knaar autór judisiáriu sira, direitu labarik no rede referral.

Objetivu hosi treinamentu ida-ne'e mak atu hasa'e koñesimentu membru Konsellu Su no comunidade sira nian kona-ba oinsa asesu ba justisa formál, saida mak krime, tipu krime, oinsa hato'o keixa no halo denúnsia, kazu violénsia bazeia ba jéneru (VBJ), serbisu Polisia, Ministériu Públiku, Defensór Públiku/Advogadu Privadu, no direitu sira labarik nian tuir enkuadramentu legál sira Timor-Leste nian.

“JSMP fasilita informasaun relevante sira ne'e ba iha membru Konsellu Suku no comunidade sira ne'e, alende hakarak hasa'e koñesimentu membru Konsellu Suku no comunidade sira ne'ebé partisipa iha treinamentu ne'e, hakarak mós atu sira ne'ebé hetan ona treinamentu ne'e, bele transmite ka kontinua fahe tutan informasaun sira ne'e ba iha membru comunidade sira seluk. Ida ne'e tanba JSMP la iha rekursu ne'ebé natoon atu bele fahe informasaun ba membru comunidade sira hotu iha suku laran, dehan Diretór Ezekutivu Interinu”, Sr. Casimiro dos Santos.

Atividade treinamentu ne'e loke diretamente hosi Xefe Suku Malere, Sr. Antonio dos Santos Loco. Iha ninia intervensaun, hateten katak, nia ho membru Konsellu Suku sira kuaze foun hotu no foin mak hetan treinamentu hosi JSMP. Nune'e, nia apresia no agredese tanba JSMP bele identifika nia suku hodi fó treinamentu ne'e. Treinamentu ne'e bele tulun sira atu bele hala'o sira nia knaar ho di'ak, liuliu liga ba kazu krime sira, oinsa bele rezolve nomós hato'o ka halo denúnsia ba autoridade relevante no kompetente sira atu bele prosesa tuir lei. Nia mós husu ba partisipante sira, liuliu Xefe Aldeia sira atu bele hatutan informasaun sira ne'ebé simu ne'e ba iha sira nia comunidade.

Iha treinamentu ne'e, OPS mós iha biban atu hato'o buat ruma molok abertura. Iha ninia intervensaun, hato'o katak hosi parte Polisia nian mós hetan treinamentu dala barak hosi JSMP kona-ba asesu ba justisa formál, oinsa identifika kazu krime sira no

refere ba iha instituisaun no organizaun relevante no kompetente sira, tanba Polisia mós hola parte iha Rede Referal, alende fó apoiu ba Ministériu Públiku iha parte investigasaun. Nune'e, nia husu ba partisipante sira atu bele partisipa ho di'ak atu bele aplika iha serbisu lorloron no mós hatutan tan ba maluk sira seluk.

Preokupasaun no pergunta sira ne'ebé partisipante sira hato'o durante treinamentu ne'e mak hanesan kestaun divórsiu, inestu, violénsia doméstika no kustu ne'ebé hasai bainhira tuir prosesu justisa formál.

Divórsiu

Relasiona ho kestaun ne'e, partisipante sira husu hanoin JSMP nian oinsa bele rezolve problema divórsiu. Hatan ba pergunta ne'e, JSMP esplika katak divórsiu ne'e kazu sivil no tuir Lei Sivil, kazamentu ne'e hanesan kontratu ida entre parte rua, nune'e, bainhira parte ida ka parte ruarua hakarak hakotu, kontratu ne'e hotu ona. Nune'e, parte ida ka parte rua hakarak fahe malu ka divórsiu, ita bele fó konsellu atu labele fahe malu, maibé labele obriga atu sira labele soe malu ka divórsiu, tanba ne'e sira nia direitu ne'ebé lei mós asecura.

Inestu

Partisipante sira mós preokupa ho kestaun inestu no husu JSMP nia hanoin. Hatan ba kestaun ne'e, JSMP hatan katak inestu ne'e nu'udar aktu seksuál ne'ebé akontese entre fetu ho mane ne'ebé sei iha ligasaun ran, liuliu hanesan inan aman ho oan, feton ho nan, avo ho beioan. Aktu ne'e seidak kriminaliza, nune'e mak bainhira iha kazu inestu ne'ebé parte sira ho idade adultu no konsentimentu, sei la konstitui krime no bainhira lori ba tribunál sei absolve. Tanba ne'e mak, JSMP iha tempu naruka ona mak halo advokasia ba kriminaliza inestu, nune'e, konsentimentu no idade sei la sai razaun ba ema ne'ebé komete aktu ne'e atu livre hosi prosesu judisiál. Maibé bainhira atu kriminaliza mós presiza defíne klaru nia grau parentesku ka relasaun ran, liña rekta ne'e la iha problema, maibé liña kolaterál ne'e problema. Ida ne'e, tanba tuir "*lisan fetosaun umane*" nian, feton nia oan mane bele hola nan nia oan fetu. Mezmuke lisan ida ne'e, liliu hola malu iha grau parentesku ida ne'e Igreja Katólíka bandu, maibé iha prátika sei eziste.

Violénsia doméstika

Preokupasaun no pergunta kona-ba violénsia doméstika katak uluk molok Lei Kontra Violénsia Doméstika (LKVD) iha, violénsia doméstika hanesan krime semi-públiku ne'ebé autoridade lokál sira bele rezolve. Bainhira LKVD ne'e mosu, problema ki'ik oan hanesan basa bosok de'it mós labele rezolve iha comunidade, tenke ba hotu tribunál.

Hatan preokupasaun ida ne'e, JSMP esplika katak molok LKVD mosu, violénsia doméstika ne'e la'ós kategoriza hanesan krime semi-públiku de'it, bele mós krime públiku depende ba iha nia gravidade ka todan hosi ofensa. Bainhira kauza hosi violénsia ne'e kman ka la todan nia natureza bele tama iha categoria krime semi-públiku tanba konstitui ofensa ba integridade fizika simples de'it, maibé se todan, entaun nia tama ba categoria krime públiku tanba konstitui ofensa ba integridade fizika grave ka todan. Bainhira LKVD mosu, violénsia domestika sei la haree ba kman no todan hosi ofensa atu determina nia natureza hanesan krime públiku, nia automatikamente krime públiku. Grau hosi ofensa ka gravidade sei sai hanesan sirkunstánsia atenuante hodi bele hatodan ka hakman de'it nia pena.

Kustu ba prosesu judisiál

Partisipante sira preokupa katak dala barak sira lakohi lori sira nia kazu ba iha prosesu judisiál ka sai testemuña tanba osan la iha atu selu transporte, sosa hahan no selu tan representante legál.

Hatan ba preokupasaun ne'e, JSMP esplika katak tuir loloos la iha kustu ba prosesu judisiál se Estadu ka Governu prepara kondisaun ne'ebé suficiente ba iha Polisia, liuliu transporte atu bele tula vítima no arguidu ba tuir prosesu judisiál. Bainhira ba prosesu mós, Ministériu Públiku liuhosi nia prokuradór sei representa vítima no Defensoria Públika liuhosi nia defensor sei representa gratuitamente arguidu iha Tribunál. Sei mosu kustu, bainhira parte rua ne'e, liuliu arguidu hakarak hili Advogadu Privadu mak representa nia iha Tribunál. Problema iha ne'e mak Polisia la iha transporte própriu atu bele tula vítima no arguidu, no tuir regra labele tula sira na'in rua hamutuk ka tula ketaketak.

Iha parte testemuña nian mós tuir loloos la iha kustu, se Governu implementa ka halo tuir Lei Protesaun Testemuña. Tuir lei ne'e, kustu transporte, hahan no toba hosi testemuña sei responsabiliza hosi Governu, tanba testemuña la ba buka justisa, maibé kontribui de'it ba prosesu justisa. Nune'e, nia problema mak Governu seidak implementa ka halo tuir saida mak hakerek ona iha Lei Protesaun Testemuña.

Treinamentu ne'e taka hosi Xefe Aldeia, Sr. Joaquim Foni Mendonça, tanba xefe suku sei rezolve problema ida ne'ebé comunidade lori mai apresenta. Iha nia intervesaun, agradese tebes ba JSMP atu bele fahe informasaun importante no relevante ba sira no husu ba partisipante sira hotu habelar tutan tan informasaun ne'e ba membru comunidade sira seluk atu sira mós bele hatene.

Partisipante sira kompostu hosi Xefe Suku, OPS, lia na'in suku, Xefe Aldeia, delegadu/a, lia na'in aldeia, representante joven suku, funsionáriu/ofisiál suku nomós membru comunidade sira. Totál partisipante sira hamutuk na'in 30 ne'ebé kompostu hosi mane 17 no feto 13.

Treinamentu ne'e realiza hosi JSMP ho apoiu finanseiru hosi *USAID/Timor-Leste Advocacy Activity for Good Governance*.

Atu hetan informasaun kompletu favor kontaktu:

Casimiro dos Santos

Diretor Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883 | 77257466

Website: <https://jsmp.tl>

info@jsmp.tl